

思

軒

文

集

思軒文集卷之十四

碑

贈通議大夫南京兵部右侍郎胡公墓碑銘

胡公諱澤字存潤號拙齋中歲病耳更號聵叟嚴州淳安人高祖克紹曾祖玉祖道昌父溫字致良贈通議大夫南京兵部右侍郎母盧氏贈淑人公少有志分知好學通毛氏詩洪武丙子領鄉薦卒業成均進試內廷授廣東新會訓導丁內艱永樂初調江西寧縣外艱服除復寧任又三載調福建浦城滿秩又調江西之永豐宣德乙卯以疾乞致仕公天性孝友在童幼時已知事親

之道父常過飲夜嘔必達旦且公兩手奉父首泣諫父為之止飲佃人汪有誣構父繫獄泣訴于邑直之居家塾游邑庠必謹於省候官遊所至必急於迎養比卒葬祭以禮兄淇嘗感瘡癘疾躬為調藥弟沐得狂疾欲手刃人妻子走避公持之與同寢處兄子昉從學於寧撫教之族有孤貧者携之官為娶婦生子嘗出緡錢若干畀鄉人貿易竊之竄去亦不以屑意其之寧也友人許姓者旅死挾其遺骸以行衆以為弗利公曰是有義焉比至揚子江中流風暴起舟且覆衆固請委之公執不可俄而風止卒無患居母喪時鄉人有負險作孽者制使

駐兵郡境將往撫之而憚於深入公褻服抵其巢穴諭以禍福衆皆散去里少年聚徒劫掠方椎牛饗土神公亟走祠下持玃環擲之曰凡玃以覆者為陰神弗饗也吾為若卜既而果三覆少年亦改謝散去永豐令姚琳病其民梗化將舉其尤三數百人奏遷之而以咨公公曰平易近民民必歸之遷之吾恐其不勝遷也姚悟更以善導而民果服教諭六安張昊以諂事上官圉利間邀公偕行公謝絕之張竟以賊敗蓋公平生視利甚廉而操履甚介洪武中

高皇帝嘗遣太學生四出覈實兵數公之東廣守將懷

百金為贈公舉

上所賜道里費示之曰此尚有餘爾金當出麾下亟還之母以汚我後歷官四邑四十年廉慎如一日居常汛掃一室昂冠終日足不及閭內非待客食不二味雖善飲未嘗至醉布袍韋帶服之終身勤學善教久而彌篤故經指授者多去為聞人顯官而公晚年造詣益深其著述之存者有古岡脩江南浦恩江諸集其為人持去不存者不可勝紀春秋七十有七以正統戊辰八月四日卒娶吳氏新會尹權之女歸公二年而姑歿于故里以不及見為恨事舅克孝處娣姒能化其悍厲與公相

敬如賓者五十年無子請公納妾周氏于靖安生四子  
長時天次拱辰累官都察院右副都御史次晨亦天次  
拱璧納粟授七品散官二女長買奴蚤卒次永貞適同  
邑周迪周氏性行端淑事公如嚴父吳氏如慈母賓祭  
之供飲食衣服之治皆身任之婦道母儀蓋並稱焉吳  
壽七十九卒于景泰壬申十一月十二日周以天順戊  
寅八月廿五日卒年七十五己卯十二月十二日合葬  
莊竹嶺之原以子貴初贈公文林郎福建道御史吳氏  
周氏孺人至是又加贈公侍郎二母皆淑人拱辰既荐  
承 恩典以少紓其顯揚之志乃屬其鄉人大理寺卿

宋公旻為行述持以過予請銘其墓道之碑拱辰正統  
己未登第為進士歷御史叅政左右布政南京都察院  
副都御史兵部侍郎復為都御史奉 璽書總督南京  
糧儲清才雅望蔚然於時謂非本乎世澤之深與親教  
之素不可也銘曰

官豈在遷稱斯可已年不待暮有疾則止惟進之難而  
退之易嗟嗟胡公可謂君子道行于家宜有佳配慶延  
于後亦有賢嗣乘時奮庸繼公之志贈官錫號承  
帝之制壽域同濟幽室永閔斲石薦辭為訊來世

山西左布政使丘公墓碑銘

成化十五年二月十二日山西左布政使致仕蘭陽丘  
公以疾終于家壽七十有六其年三月二十八日葬邑  
艮隅祖塋之次南京兵部尚書三原王公既銘以掩諸  
幽矣而墓隧之碑尚未有文至是公之子給事中璐來  
請於予公諱陵字志高別號芸菴少秀悟刻學勵志宣  
德己酉河南鄉試第一人庚戌會試中乙榜授咸陽縣  
學訓導以嚴毅方正為學者師嘗陳時政十二事于朝  
正統己未陞平鄉知縣其俗信巫鬼無醫藥公至撤其  
淫祠驅巫歸農而教民業醫先是河決縣境築隄三年  
不成公命囊土沉舟功立就因請隣邑皆築隄捍障亘

三百餘里水患遂息內艱去官邑民逆計其終喪詣闕  
請復任

上從之公益修政教嚴法禁有僧執左道以奔走不逞  
縛置之法黥盜累訊不服以葦箔束人空室而械盜其  
中遂具得其情嘗途遇健夫廿七人出奇捕之即盜劫  
唐藩有詔大索于江北者也己巳虜寇犯順畿內繹騷  
守土之臣有遁去者公日遣遊騎覘伺之以預為之備  
募士馬繕器械誓與城存亡且請發臨清倉儲以濟饑  
餒民樂死守而措紳士有巡遠之望尋陞真定知府時  
虜警未息歲復不登公備城守施賑贍視平鄉益加嚴

辦且條畫兵荒十策白諸當道行之皆有奇驗未幾以  
舊守復任改淮安府首興學校躬課諸生誨教民條約  
每十室給以一冊俾更相糾率又榜民善過于門以示  
懲勸命耆老察民之貧不能婚喪者給其費而奢僭者  
有罰視徭役重輕釐其戶為九等正雜相距五年而周  
民甚便焉歲侵疫作發粟施藥家無不至大水漂溺操  
舟載糗餌以拯援之籍淮之兩城每十室令飼流逋  
一人會朝廷方有詔撫輯公亟發京運米五十艘以  
蘇其困然後優加惠賚給之畜產教之樹藝居數年流  
民占業如土著者公又謂備荒不可無策乃請得內帑

銀三千兩募民畊瀕海地數千頃租入十取其三久之  
餘息可數十倍同官請納還內降以表其績公不可曰  
使司國課者槩責他郡遺患非小第取足備荒有餘則  
代民輸賦可也暇日徧考古昔名賢之有功封內者建  
祠祀之拓新徐節孝祠墓若釋道醮禳之典陰陽拘忌  
之說悉為掃蕩其諸姦偽之誘民傷化者皆屏遠不容  
于境天順庚辰入覲以治行卓異降 勅獎勵錫燕禮  
部賜衣一襲寶鏐千緡陞辭適遇

慈烈太后聖旦復有旨留與廷燕皆異數也辛丑陞湖  
廣右布政使苗民逆命公再與征勦降蘭牛烏陂等三

十七寨擒渠魁李泰宗誘其部落歸所虜邊民子女千  
餘人釋逮繫株連者數十人而捕土兵之妻掠良家者  
重加譴責運夫之歿於軍者資給同役俾函骨歸葬賊  
平主帥將上其功堅拒不聽欲擬其子壻兩官亦不許  
第受綵幣寶鏹之賚而已甲申轉山西左布政使首奏  
罷內地之民之遠輸者沿邊郡邑雖不免輸遇儉歲亦  
聽其折納銀布其他徭役之施於兩藩即所以施於淮  
者而推行之而民咸稱便至於興學劭農恤災捍患凡  
可以益國而裕民者則後先一政無少怠廢其治獄明  
慎多所平反如甲殺人城上攘其金欺乙之孱而誣持

之者則給得原金以免乙屬邑令潛置賊於民家積薪  
內而誣其為聚劫擬死雖監臨亦為之右而固執不可  
悉從原釋捕盜官族囚妄指富家為窟穴獄具公廉得  
之竟與反坐民婦被殺溺屍深淵久不獲公偶經溺所  
屍躍出水中獄遂決諸如此類不可殫舉成化己卯再  
覲于廷懇乞引年當道謂公且內擢弗為通會言者以  
私隙劾公抗章辯白之黜妄劾者而詔許公休致公  
歸即所居汴第築圃結亭偕諸耆宦巾車往還飲酒賦  
詩為樂歸十年以子貴給二品誥命進階正奉大夫  
勲正治卿孺人谷氏進封夫人公卒之年十二月廿四

日夫人亦卒壽七十二明年三月二日與公合窆子男  
四長琥次即璐登進士第歷官南京吏工二科給事中  
博雅端介人謂其有父風珣陰陽訓術珙中丁酉鄉試  
女六其五皆適宦族一子孫男五鍾曙銳晚銳公為人  
天性剛方才識瞻敏平生所歷皆雄藩劇郡人憚其難  
而公處之皆有餘裕所至不獨民懷其德雖鬼神亦感  
其誠而為之孚祐初奔太孺人喪觸暑疾躁甚欲絕醫  
云得冰可解時盛暑無從得冰俄天雨雹家人競取以  
進疾遂瘥再至平鄉則野蠶成繭民取為縑烏巢庭樹  
有雙白雛中使偶道其境將取以進公縱雛使絕其跡

守淮則有紫芝三本產於冰玉軒側歸老之日假寐夫子回車廟下忽有神人止公勿行無何震霆雨雹山溪暴漲行旅顛蹶有溺死者有術士凡入人居第輒能道禍福與先世名諱嘗謁公莫措一辭迫之愈窘人謂花月之妖遇狄梁公則匿形不見此為似之牧晉有屬吏怨公之褫其職以誣公者御史被旨鞠之方欲言而忽仆掖出已死晉人又謂與運使欲殺劉元城事絕相類大抵英風勁氣見者潛消其暴厲之心而況於妖妄者乎至如平鄉有去思之碑淮安有生祠之建惠民集遺愛歌之傳此又天理之在人心有不可泯者非偶然也

予素慕於公且交給事君有年故不辭其請而銘以復之銘曰

於皇

列聖繼明麗天綱紀四方所用惟賢元元丘公起家庠校時政之陳用禪於教小試一邑民有去思更典二郡益闡猷為北邙用兵四封有警申飭捍禦迄於綏靖淮南阻饑流莩滿途招徠拊循卒免於殍方伯載遷由荆及冀威行惠施所至稱治苗民逆命兩預徂征馘其渠魁獻于王庭民苦遠輓首罷其役粟帛均輸邊圉充溢泛應曲酬神閒意舒人之不足公乃有餘崇論欲議明

目張膽公之勇為人所不敢

天子曰嘻此予元僚錫賚便蕃且登于朝彼窮奇者方肆其毒既抵於戮公乃納祿偃休于家優游暮年恩綸煥頒有子象賢塞塞在廷世濟厥美申錫寵褒其承未已歸視其阡松栢九九植碑墓門來徵刻文勒美鼎彝流芳竹帛同永於垂此石不泐

廣西按察司僉事致仕中復先生鄭公墓碑銘

先生姓鄭氏諱觀字允巽初字尚賓常州武進人曾祖諱某祖諱通甫考諱銘以公貴贈文林郎江西道監察御史妣戴氏贈孺人三子先生其季也天賦敏穎甫能

言見母將食河魴魚遽止之曰兒聞此魚有毒能殺人  
家人驚異知其不凡既而考妣相繼歿伯兄允孚長育  
之延師教之弱冠以兄命居蕭田別業治隰田數百畝  
躬率僮僕播種歛穫區別疆理井然有緒雖甚勤苦而  
學無怠廢時郡著姓嚴斯道死有遺孤女其妻孫氏守  
節求得壻能終養者聞先生賢遂請諸其兄而館焉先  
生日具甘旨事孫如母暇則親賢取友以相切磨信國  
湯公之孫仲光延居家塾訓迪其子遠近聞而至者先  
後數百人至席不能容先生皆隨其才質造就之永樂  
辛丑縣簿鄭溱將薦于朝懇辭弗就洪熙改元 朝廷

遣進士齎勅訪文儒于常蘇松三郡郡守熊侯觀以先生應詔同舉十一人試天曹以先生為首會

仁廟上賓不果用太傅安遠侯柳公昇遂請於朝以為子師柳公弢子溥嗣先生上疏辭歸特旨授訓導仍館其家蓋列侯之第有訓導者自先生始無何禮部尚書胡公薦陞廣東道御史轉江西道自冷局陟顯官如先生者亦前此不多見也先生於是盡舉平日所存以措諸行事凡分所當為為之一無顧忌初巡天財庫繼巡畿甸兩奉 璽書整飭西北諸關隘所至威惠並施士卒趨赴恐後事有未便悉更張之還奏稱 旨正統

庚申巡南北運河兼檢閱關津所輸舟船稅鈔以均給  
於遠歲鹽商人稱平壬戌出巡山東首劾藩司之正  
佐各一人臬司都司長吏之蠹政者二三人罷黜之郡  
邑庶僚以貪墨去者又未可指數武弁干紀至以勢撓  
先生切責之不少貸疑獄積歲未決者悉為剖斷蓋一  
循乎公法而無恤利害 魯賢王聞之每宴必舉觴相  
屬且親書中復堂字以賜乙丑用太常卿蔣公薦陞廣  
西按察司僉事分巡蒼梧諸郡其行事無異齊魯犺犗  
猖獗兩奉命察贊副總兵田公勦平之 朝廷亦兩遣  
使齎金身服衣寶鏤為賜時柳侯方開府廣右見先生

執弟子禮每事必請先生亦隨問而答咸有規益至於  
餽遺之禮則深拒弗納景泰庚午入朝遂乞休致時年  
六十有一天順甲申援詔例進階朝列大夫蓋在仕途  
者二十年比歸林下又二十年以成化庚寅十二月二  
十七日卒春秋八十有二卒之前夕猶命諸子具酒飲  
至丙夜不寐飲罷命具紙筆為鄉先達丁約之作贊口  
占授冢子畏曰爾第書之吾不能親書矣黎明命輿至  
中堂危坐瞑目而逝諸子始扶就寢閱三日始斂容色  
儼如平時噫茲非所謂俯仰天地間浩然無愧者乎先  
生為人稟性剛方識量恢宏自處困乏以至居貴顯始

終一致華美之服珍玩之器皆性所不好也既謝事即別創一室貯粟百斛名存餘倉將以供祀謂常存其餘久之遂以周貧每歲訖無餘輒復繼焉有假貸不責其償人有患難拯援之不待其請親友過從款洽無厭睦宗和族恩義逾篤然於教子孫則一以嚴毅子三人垂白侍側不假辭色遇諸卑幼隨事箴戒肅然慄然無不拱服見之者率能銷沮其奢豪蕩佚之心而即之者無不熏炙其溫厚和平之氣嗚呼老成邈矣典刑猶存晚生後進豈不猶有聞風而興起者乎先生祖塋故在郭北三里許塋側有田纔數十畝始自壯歲經理開拓積

五十稔至嬴二頃營構廬舍移家居之蓋舍在墓右居  
之左為祠堂三間其西北隅葬從姑洎外母孫亦構堂  
三間扁曰雙節堂右有燕毛亭頤壽堂務本堂大抵皆  
從朴素俾子孫可以世守故既植碑刻 賜勅其上復  
為規戒如世所謂遺言者勒之碑陰使顧諟焉周匝墓  
廬環植果木竹樹動以萬計居常暇日曳杖逍遙其間  
因自歎曰凡此基業皆先世所有而失之者吾於中葉  
僅能興復因取易復之六二中行獨復之義自號中復  
學者咸稱中復先生云先生博覽經傳而尤熟於史為  
詩文冲澹簡易不事刻琢所著有中復存稿休耕間話

至於篆楷書法亦臻其妙配嚴氏妻孫氏王氏子五男  
畏戒謹嚴出默孫出存王出二女蔣恂高復亨其壻也  
孫四男綸經維緯三女初先生之歸也畏方舉賢良為  
建寧府經歷謹中鄉薦任贛州府通判獨戒侍左右未  
幾畏亦謝事歸比先生歿而謹亦致仕鄉人榮之畏敦  
尚古道行已接物動必以禮人謂其綽有父風先生既  
卒之明年十二月某日其諸子奉柩葬所居杜巷村先  
塋之次今十年矣建寧頃持其從弟知灤州鼎所述狀  
來屬銘吾兩家居同里聞先君子長公一紀嘗同仕於  
朝同歸老於家而予亦從其諸子遊篤世契故不辭其

請而序以銘之銘曰

世降俗媮士解聞道與時推移出處異操維公卓然古訓是師德義孔時窮養達施仕有偉績

帝有寵賚歸不待年惟義所在杜巷之園林木茂繁相羊扶藜亦蕃子孫亦有世祿以供滄漣壽考令終俯仰無愧封域隱隱其安其藏盟誓耿耿有碑其旁咨爾後人毋食示訓嗚呼先生無窮之聞

嘉議大夫應天府府尹彭君墓碑銘

君彭氏諱信字中孚浙江仁和人少以才俊補郡校生力學工文詞在諸生中已燁然有聲景泰庚午中鄉試

辛未中進士甲科會憲臣有言宜選進士中才茂者積  
學中秘如永樂初科故事君與選入翰林為庶吉士癸  
酉擢山東道御史巡歷紫荆諸關塞修城堡建斥堠防  
慮周悉邊庭為之無警乙亥巡按廣東時嶺南未靖武  
將專征頗易君儒生君初不為較一日將出師誓衆君  
伺帥語間為陳說方略申嚴號令揆度事機切中要害  
卒之殄滅夷獠兵無挫衄君指縱之功居多得奏帥以  
彼所得賞格讓君君曰吾文士也吾自有階奚以武為  
識者偉其功而多其不伐丁丑奔父喪歸杭服除改貴  
州道尋受勅命進階贈封其父宗善為文林郎貴州

道監察御史母姚氏為太孺人己卯冬巡按陝西歲滿且代藩憲交章願留謂關右民勁悍其巽慝者至不能自立君治之強者鉏弱者植威惠並行得憲臣體

上從之為留君再葺壬午巡按河南蓋君自陝西還未浹月而關以東與河南比境先聲所至奸宄屏跡吏無受賕而流移占復當是時君為御史秩且滿巡歷諸藩無寧歲其勞績茂著

上在東朝雅知之及即位遂陞君順天府丞順天畿甸在輦轂下征徭常倍蓰他郡加之達官貴人園田錯午侵牟武斷民用困瘁君贊治之暇周行列邑揚摧折之

威施拊循之政方嚴之下惠裕繼之三年奏課復賜  
誥命階中憲大夫加贈宗善如其官母封太恭人會應  
天缺尹陞君任焉壬辰四月甫蒞任秋八月己酉感風  
疾卒先卒一月其兄恭自杭奉太恭人來就養時年七  
十有九君退自公輒携其子明娛嬉母前明纔十二君  
撫之告母曰兒幸荷國恩得至此圖所以報不徒欲  
遂吾一家之歡蓋將推以及民老老幼幼俾無一家之  
不遂其歡嗚呼君之志何如也而今已矣此閭巷之民  
所以奔走吊哭慕之切而哀之深也君為人性度坦夷  
人謂其有納污藏疾之量至於遇事敢為果斷立發則

又謂其不茹柔吐剛君生永樂辛丑某月日享年五十  
有二元配王氏繼嚴氏皆由孺人贈封至恭人一子即  
明女二幼在室明將奉君柩以某年月日歸葬某山某  
原以予與太常少卿劉君宣皆其父同年友乃致太恭  
人命請太常述行而屬予以銘昔同年讀書秘閣者二  
十八人而出杭郡者四人相得一時歡甚厥後二十八  
人者榮辱升沉之外又重有存歿之感獨幸君與王學  
士獻童庶子緣張刑曹瑄四人者皆無恙而予與太常  
又獲陪君同仕于南都方竊自幸而君又去予以死此  
予所以慕而哀之者抑又有甚焉者也銘於君何靳焉

銘曰

嗚呼吾聞之大道之行也天下熙熙使幼有所長而老有所歸嗟吾中孚五十非天官登三品夫豈為少其所少者終養北堂子少而才教以義方昔人有言世所可喜君兩棄之其悲曷已人孰無死泯於無聞何以慰君不亡者存

錦衣衛都指揮同知袁公墓碑銘

鎮守淮安總督漕運叅將錦衣衛都指揮同知袁公以疾終總兵官平江侯陳公銳哀公以死勤事又惜其失賢佐理也吊哭之且親視其殯歛既而武弁之在麾下

卒伍之繇漕輓者皆奔走相吊哭士大夫之去位而巷  
處者嗟悼之無已而致仕河南叅政史君敏遂追述公  
平生以授其子勛使圖諸其不朽焉勛扶櫬歸江東以  
卒之年七月某日葬應天府江寧縣某山之原前期衰  
經踵門請予題墓上之石公諱佑字廷助其先頴上人  
祖聚從

太宗文皇帝靖難有功累官燕山右衛指揮同知考紀  
龍調南京留守左衛遂定居金陵留守為人有才略而  
喜文翰嘗大書公勤廉儉四字于座隅以自勵又手書  
涖官行已忠孝大節數十條于家以勵其子姓公用是

克邁乃訓懋建勲業以增光前烈者涵養之有素也公  
自為兒時已不好弄稍知讀書日游武學從師講論聞  
古名臣良將事即奮然興起有思齊之志正統乙丑嚴  
父職漸著能譽為當道所推舉總理南京三十六衛上  
供船艦蠲其宿弊旗士悅服天順丁丑兵部薦公提督  
新江口舟師久之四川松茂州弗靖總兵官許公復薦  
徃從征比達其境招討高姓者懷金寶數十器暮夜來  
饋公正色却之曰爾為命吏既不能禁戢番夷使無侵  
剝致勞王師遠來乃反欲以賂遺汙我耶爾亟去不然  
吾直以軍法從事後事竣歸行李蕭然其廉聲亦播聞

于人癸未巡撫兩淮都御史王公薦陞都指揮僉事監  
督京儲未幾廷臣又薦公才堪大用

上於是降璽書命充叅將協同都督楊公鎮守淮安專  
理漕運公持操愈堅蒞政愈勤

上念其勞進陞都指揮同知成化辛卯楊公得請引年  
公亦上疏辭疾不許徃歲夏漕渠水涸議者謂宜僦舟  
轉輸公竊計其費不貲輦蹙曰必若是則士卒之財力  
竭矣曷少需之閱旬日乃雨江湖水溢舟行無滯是秋  
維揚旱公齋沐禱于神祠又連得大雨兵民歡呼而公  
以頻年歲凶漕務多艱士卒疲弊訖無少自愜意會泰

寧侯陳公歿 詔下兩廣還平江于淮總漕事蓋平江  
之祖恭襄嘗有功淮南人思之故有是命比至與公相  
得歡甚而公亦竭誠佐理期於有濟自春徂夏往返江  
淮不憚勞勩舟過高郵因感疫癘人勸歸療公猶慮儀  
真上壩之舟未集更欲往而力不任歸纔二日而疾亟  
遂卒公天質爽朗志行脩潔未貴時嘗與客同行過大  
市街拾遺金一餅客去公獨留移時果有號呼來覓者  
詰其實還之故人萬公著親亡無葬地割已地予之堪  
輿家以為予之當弗利曰吾聞之朋友死無所歸曰於  
我殯吾知篤吾義而已夫安計其利不利哉公在淮有

司以解宇敞陋請改作曰數百萬士卒暴露經年吾何暇求一室之安第時發已帑補葺之而已公卒於成化九年六月壬申得年五十有七配蕭氏側室徐氏子男五勛勳勤勉勛女三泚蘭適蔡壽泚蕙適京庠生潘漢泚端聘許張鳳者在室孫男一漢嗚呼國家之財賦在東南歲漕京師者數百萬斛而後漕卒以數萬計自頃以還其弊日滋漕卒每稱貸自給而豪右因以圉利必求通才如公者以剔其蠹而疏其利以為上下之所倚賴而公已矣然則於其卒也寧不為有識者所共悼哉為之銘曰

潁川之袁世為著姓暨遷金陵燕山啓慶元元留守遺  
訓後人公克適之以飭厥身遭時奮庸王事執掌或從  
征伐或給餽餉位日以顯功緒卓殊積倉峙糧經國遠  
圖漕渠絕流公裨以計旱暵為菑公禱而雨農扞于野  
士歌于途公不自有誓捐厥軀維古名臣鞠躬盡瘁於  
公何歟隱加問賚都城之陽撫撫鱗原銘以彰之百世  
其傳

應天府府尹魯公墓碑銘

公諱崇志字懋功姓魯氏其先汴人仕宋為散騎常侍  
諱澤者公十五世祖也南渡徙家嚴陵八世祖祁溫州

平陽令又自嚴陵徙天台遂著籍焉曾祖谷珪祖友敬  
以子貴贈監察御史考穆累官都察院右僉都御史風  
望重於一時母恭人張氏公為兒時從父宦遊于閩已  
能歌詩善鼓琴見者竒之弱冠都憲歿未幾恭人繼歿  
哀慕如不欲生兄崇吉慰勉之曰孝以繼述為大母徒  
毀瘠為也公於是勵志於學景泰庚午領浙省鄉薦邑  
大夫璫以白金力辭弗受甲戌登進士第授吏科給事  
中彈擊不避權要

上嘉獎之賜五倫書一帙天順初奉勅齎銀數萬兩  
給賞遼戍防範嚴密下無敢欺戍者皆蒙實惠尋

命賞京士衣絮其立法之嚴與施惠之均與前賞同既  
又奉 璽書冊封 秦王賜綵幣鞍馬公辭 王曰敬  
朝廷以禮使臣宜毋辭公曰奉 命而來臣之職也受  
此則有辱朝命 王賢之不能強時武臣曹欽跋扈舉  
兵犯闕公適待漏闕下駭其事即馳馬與曹一偏裨格  
鬪大軍尋亦合而曹就誅矣癸未陞南京太僕寺少卿  
時民困於牧而官恒不足於馬公徧歷州郡釐其宿弊  
傳以新法不數年馬遂蕃息而民咸稱便成化癸巳陞  
應天府尹先是七邑民阻饑逋賦數萬石公為勸貸以  
代之輸而賑其貧者溧水民孔姓者武斷于鄉人患苦

之而有司莫敢撓公擒置之法中貴人王敬怙勢以鹽  
二萬引懇鬻於民規重利公厲辭色以拒之蓋公急於  
為民謂害不除則無以興利故鉏強抑暴有烈丈夫之  
節至於民困欲蘇而勢有不可必請於

上以祈沛澤又有古循良之風焉壬寅九載秩滿陞正  
二品祿仍掌府事明年癸卯八月二日終于位壽六十  
有六計聞遣官營葬仍命藩司諭祭公為人愷悌詳雅  
以公道自持廉操自礪怨有不讐德無不報雖一介不  
苟取予所行盡其在不求人知故南畿士大夫或許  
以王道或稱以長者君子以為知言配奚氏封泐入三

子長詢蚤世次諒次諤由庠生援恩例入監三女適張  
昕姚适楊皖孫五男儼份儒倬備四女公葬以其年月  
日其墓在邑黃山之原予與公同宦兩京交久而善雅  
知其才行之偉至是諤又具世系履歷來乞文將植碑  
墓道為之銘曰

振振魯氏家世衣纓孰顯于明有偉中丞中丞立朝審  
審暨暨用之未既以貽厥子繼擢甲科荐列諫垣匡拂  
時病知無不言益闡才猷肅將王命比佐太僕聿修  
馬政矐茲留府宿弊滋多公來作尹政通人和

帝曰嘉哉爾有勞績揆厥本源綸音載錫御煩以簡易

猛以寬惟爾之宜爾仍舊官公感知遇勤不遑暇天不  
假年奄其觀化歸藏一丘黃山之原勒銘墓碑永矢弗  
諼

王氏先塋之碑

上即大寶位續承洪業圖任舊人乃首詔起尚書王公  
于家命有司勸駕公在道辭比至京又辭皆不可立拜  
吏部尚書未幾加太子太保又辭不可蓋每辭皆答以  
溫詔有年德老成久繫人望之褒公感知遇黽俛就職  
銓鏡人物澄汰流品振幽滯杜請託異時丐賕宿弊一  
旦掃除略盡至於大政事大號令凡廷論未決者公正

色讜言力扶國是聞者拱服蓋公既悉心奉國  
上亦虛已以聽志叶道同言行計施豈非千載一時之  
嘉會哉公在位五年為弘治四年五月 賜誥命進階  
光祿大夫勲柱國馳恩三代曾祖彥成祖真考智皆贈  
光祿大夫柱國太子太保吏部尚書曾祖妣張氏繼侯  
氏祖妣張氏妣周氏皆贈一品夫人 雲漢之章照耀  
門閥雨露之澤滲漉泉壤公感激圖惟不朽適予自南  
都入朝過予言曰恕世家關中高祖樂耕府君以上皆  
居櫟陽司馬村元至正中曾祖始徙三原之龍橋龍橋  
距司馬村七十里實為唇齒之邦曾祖字安止性耿介

不羣治家勤儉人有緩急赴之恐後卒葬縣北三家里  
與二妣合兆祖字惟真侯夫人所出居鄉恂恂執禮嘗  
兩為鄉飲大賓縣大夫雅敬慕之生四子長諱禮好學  
樂善言動不苟卒葬三家里祖塋娶任氏守節四十年  
辛勤撫育遺孤次即先考字仲智號西園翁淳誠謙虛  
禮賢好施篤於教子配先妣有賢行次諱德篤實不欺  
勤於治生娶李氏次諱和為人質直非善不交娶袁氏  
恕昔為寺副京師正室蓋夫人卒歸葬西園時景泰癸  
酉六月也遂舉祖考妣伯妣叔考妣數喪而同窆焉天  
順甲申繼室張夫人卒于江西藩司亦歸葬西園成化

乙酉恕擢副都御史未久先妣卒 朝廷遣官賜祭戊  
子先考卒復賜祭遣進士蔡晟即西園治塋域以己丑  
十月二十日襄事於是享祭之堂制勅之碑法所宜有  
靡不具完扁其門曰王氏先塋厥後叔和兄約齋卒亦  
葬于其次惟恕學寡能鮮幸際

明聖以至有今日皆先祖考之敷遺也不有紀述何以  
昭示我後人使知所自而迓承之乎君其為我作先塋  
之碑垂諸悠久幸莫大焉予聞公家自渭川處士以來  
傳六世積德百餘年宜臻顯融者久矣然猶務韜晦訖  
不一施用以遺之後人以俟公而大發焉此公所為積

學勵行以出應時需敷歷中外致位通顯而晚益際遇  
輸忠竭誠茂建勲業為國元老益公既發其祖考之遺  
以顯融而光大之而復歛其餘贏以遺之子若孫而公  
子七人並稱時彥一官留府兩舉鄉闈文學政事無愧  
世濟諸孫纍纍亦復秀穎名門世胄當時鮮儷大書深  
刻植之墓隧以侈

上賜以彰先德垂之無窮詎曰匪宜詩曰

三原之王系出太原譜迭其傳冰演枝蕃櫟陽之居龍  
橋之遷一德相承代產仁賢蓄而未施室而未宣其宣  
其施其在公焉維公挺生英稟卓異奮身儒科以階祿

仕自庠而崇由遠而通出入

五朝綿歷四紀指斥權倖觸冒忌諱

一作匡拂時病磨切近貴

苟利

國家他非所計維公忠誠

帝所簡知公休于家驛使交馳公來在廷國有著龜一

節始終不植黨私維

帝聖明曰予舊老豈無寵章覆其祖考秩之冢卿爵之

官保兩國之封載錫嘉號公拜稽首祇服

休命匪臣

之能祖考之慶懿美斯彰優渥殊章曷顯詩之傳之有

永睠彼西園松柏蒼蒼三家里瑩蔚乎相望遺蔭後昆

俾熾而昌更千百年眎此石章

董氏先德之碑

予友上海董君綸任南京河南道御史三載獻績且行其母江孺人終于家君馳歸營葬葬已具事狀來請銘且曰綸先世以積善起家凡厥配偶皆擇德良族故內外雍睦庭無間言孝友相承今五世矣而墓上之石未有登載顧何以訓我後人昭示罔極綸鄉郡末學嘗辱私於先生垂此不刊逌我大戾先生宜無愛焉董氏其先汴人宋南渡後徙居松之上海高祖官一妣周氏居竹岡洪橋東鄉人謂之飛來落蓋諺語猶所謂非土著也曾祖仲莊贅韓氏為人剛腸嫉惡人有忿爭就之取

直雖服其公而不能無怨洪武間韓婦翁為怨家誣構  
賊鈔事逮繫詔獄曰怨吾取也請代翁行比至則其人  
已死莫與置對亦竟死京師時翁老子幼其喪亦竟不  
能歸鄉人冤之咸謂其後必昌二子長思賢贅江氏次  
思忠號遺安贅宋氏居華亭東之車墩兄弟友愛見利  
能讓雖異處如一堂思賢卒年三十六葬車墩之俞塘  
江守節自誓思忠事之如母撫其遺孤有恩思忠中歲  
始歸理韓氏舊業間亦貿易江湖貲帑雖富而服食恒  
儉嘗即韓之東址建草堂數楹以居今所居即其地也  
壽六十有三以正統壬戌三月十七日卒宋勤於內助

雖老猶不廢女紅卒年七十有八生二子長真字以和  
號怡竹君之考也次正字以平號愛梅以和性敏有識  
量讀書取通大旨嘗代父典鄉賦賦有常而歲或不登  
則鬻產以代之輸產既去懼貽父憂乃服勤稼穡期於  
克復積二十稔其業果振正統間郡邑復辟典鄉賦既  
不可辭而前事當戒凡民有逋竄田有蕪穢不治者皆  
預為之計招徠而墾闢之時巡撫周文襄公雅知其賢  
又俾為總收總收者兼典一邑之賦也邑大夫遇事有  
疑必召與謀與丞簿有隙必藉以解紛至於禁戢武斷  
周恤窮匱鄉之人尤庇賴焉平居自奉澹泊能守其家

法事親孝謹服勞無怠即親有不豫色引咎自責處庶  
弟弘人不知為異出訓子姓必由矩度父卒且葬霖雨  
不止號泣籲天聞者憐戚襄事之旦天為開霽已而復  
雨會葬數百人咸歎息以為孝誠所格與弟同居四十  
年克篤恩誼勞事必先美服必讓而以平亦祇服弟道  
惟謹有事必咨而行兄出暮歸必衣冠迎候于門兄疾  
侍湯藥請禱無所不至病且卒猶呼與語且諭諸子曰  
吾念吾弟吾母年高終養幸吾弟是賴爾等尤宜謹身  
飭行尊卑協和無異吾存日吾瞑目矣時景泰辛未十  
一月十三日年四十有八以平治喪撫孤哀與情稱越

三載亦卒江孺人華亭宦族稟性端靜善相其夫克復舊物雖處豐裕而勤儉如初久之綸既貴遂奉迎來京享有祿養成化甲午夏忽遘瘍疾思歸歸兩月而疾革謂諸婦曰吾某日當去取親製歛衣授之更取餘衣分給諸婦姻戚至期果卒是年六月某日與其夫合葬某鄉某原子男二長經次即綸一女贅袁泓先卒孫八人麒麟經子恢恬忱懌懷怡綸子曾孫四人振宗彰宗繼隆繼顯予嘗論名宗望族不患無高貲顯爵以遺子孫患無德爾苟有德以遺之則衰可為強室可為通如董氏者當國初罹禍之時其嗣續不絕如綫江宋之贅

幾忘其本財賦之任殆喪其業然皆既蹟而振既屯而亨以開此昌明碩大之宗謂非一德之傳不可也本之以忠信植之以學術培養之以孝弟灌溉之以仁義此其承先裕後之謀也予既論撰之復系之以銘銘曰

維董之先世為通儒宋室南遷去汴來吳占籍上洋亡其譜牒曰官一甫克紹先烈洪橋之居以遺仲莊既倩于韓舊業淪亡仲莊桓桓嫉惡致愍階禍自吾之死不悔遺澤不泯二雛挺生翔集異處嚶鳴同聲車墩之麓伯也夭折惟仲遺安卒承韓業既作室堂亦勤敷菑曰予有後矢弗棄基怡竹允臧公賦是職家雖蕩廢義聲

籍籍復還故物惟儉惟勤爰暨愛梅孝友克敦誠感於  
天克襄大事義重同居閱四十禩一庭輯睦人無間言  
雖世有德亦婉之賢娣姒協和婦姑同道共姜之節孟  
母之教有子亢宗奮庸於時列官臺憲耳目攸司厥績  
用誠

皇有嘉賚風木興悲孺人不待垂休址美子孫振振世  
德之胄於時罕倫植碑墓門式彰美故咨爾後人引之  
勿替

思軒文集卷之十四

思軒文集卷之十五

墓碣

右軍都督府都事倪君墓碣銘

君諱敬字汝敬姓倪氏常州無錫人曾祖文斯祖峻永  
樂間累官兵科都給事中父愉以君貴贈文林郎河南  
道監察御史母孟氏封太孺人君弱冠喪父家無饒資  
營甘旨以養母而勤不廢學正統甲子以壁經領鄉薦  
戊辰登進士第拜河南道監察御史三載授勅命進  
階贈封其父母妻景泰末坐言事左遷廣西宜山縣典  
史

今上復位詔雪寃滯還君七品官吏部奏移君善地授河南祥符知縣君適從八桂來賀

皇太子千秋節以素受知安遠侯柳公溥請於

上以君從討西戎改右軍都督府都事居幕下比還士方期君柄用而君已屬疾天順三年六月十七日卒于寓館君自為御史知無不言遇事敢為無少顧避屬時歲凶畿內尤甚民弱者為餓莩強者去而為盜君奉命綏輯之請貸民今年田租地官卿不可移文督州縣征輸愈急而君卒奏罷之民賴全活者以億萬計山西戍將利軍餉事覺朝廷命君廉問君歷宣府大同諸邊

城悉左驗責償無逋幕府充牣景泰壬申勅御史公正者十人協同總戎占數兵伍慮部曲有傭糴者有發無以應調君首預焉事竣巡按八閩閩地舊多銀坑啓閉不常時言者謂寶之足以潤國下地官議君按節未行即䟽引唐德宗故事且言其地方殘於寇其完者疲於供億是瘡痍未瘳之民也不宜重困事遂寢守土內臣戴姓者畜蒼頭挾勢恣橫以困民財藩臬諸君心非之而莫敢誰何君再上章卒召戴還且命治暴橫者民相慶于道形諸歌謠甲戌大水乙亥旱疫災異迭見然方興土木樂遊畋糜大司農錢穀以崇事佛徒朝政多缺

夫君率同官伏闕陳敬

天脩德八事䟽入忤 旨徒以言責君不欲顯寘之法  
陰戒都御史蕭公維禎以考察去君君登臺自劾曰敬  
無知冒抵時諱固當去請無煩就考蕭公默然良久曰  
第為之無損爾名於是宜山之命君即日上道過家  
辭老母以行意氣慨慷雖蒙瘴癘死萬里外不恤也識  
者偉之幸而公道在廷君方自外而內而天遽奪其筭  
以不克永終嗚呼惜哉君負器識自少以經略自許僅  
小試之其所建白已昭昭在人耳目其可紀者槩如此  
使天假之以年都高位受天下重寄其功烈又何如其

炳灼耶君性好飲酒能多而不廢事然尤喜吟咏酒酣  
縱筆五七言長短歌行立就評者謂其得溫李體及遭  
擯斥其發於詩者尤多托辭比事以摠忠愛之心無哀  
怨之音也君生於永樂丙申春秋四十有四娶彭氏封  
孺人一子曰相如君卒之先十日其外舅彭公自鄉郡  
來遂殯殮君携櫬以歸以某月日葬君惠山先塋泣謂  
僕曰汝敬平日所與游而最厚者宜莫如君君可遂銘  
之嗚呼公之言誠是也君性狷介喜自負闊視一世人  
莫有當其意者然予獨幸以道義相從終始如一日君  
還自廣西留予所最久其疾至病也予數候之亦頗以

後事為託銘非予其誰宜為銘曰

玉琢於璞劍發於劍維士之良猶器之成易毀者瑜易挫者鐸器厄於用亦士之若嗚呼汝敬其用幾何韞而藏諸存者實多孰豐其才而嗇其壽天實為之吾將焉咎惠山之陽歸藏于斯有欲知君視此銘詩

處士趙廷和墓碣銘

景泰六年乙亥予宅憂在禪崑山趙主事克周以進士奉使道毗陵求吾廬而訪焉且請題其兄廷和之墓曰吾兄賢者也不幸而死問其年幾何曰二十有九歿幾時曰二十有三年矣賢而不壽久而無聞皆君子之

所不忍事應銘徒以克周方懷靡盬不暇致詳而予亦  
集于蓼未果也比予還京克周復列事狀來請于今又  
五年矣古有之知善不言與器瘠同然則予可卒於無  
言乎君諱閭廷和其字世為蘇人曾祖文善元醫學提  
領祖子良國朝以儒醫就徵父止敬母曹氏生君兄  
弟六人君次為仲子少穎爽長而慕學事父母盡孝待  
宗姻族黨仁而有別外舅邵均行氏貲重而役繁而均  
行疾有子不克家君代為之理而家賴以全君性好稅  
予人鄉人貧不能自植者給之田授之錢鑄之具而不  
賦其入喪葬無所者制棺衾以與之且畀以不食之地

里有梁歲久而圯為新之濟渡有舟時葺其敝涉者利  
焉自是嚮義之風動于遠邇無有求而弗應於遇鴻生  
碩士尤禮下之無怠容蚤喪母時二弟勉博在髫鬣君  
泣以語之曰吾母臨終惟以爾等幼弗及字為念重以  
我之不敏固知幹蠱以重吾父之累顧遑恤乎他爾等  
質敏而志不凡可刻厲於學以光大吾宗而我亦惟爾  
之榮二弟聞之咸感激思奮勉字克強舉于鄉仕吳興  
郡文學博即克周登進士第今為夏官主事君娶鄒氏  
一子曰震鳴呼先王教遠士率以詞藻相高功利相誇  
詡孰有能反華就樸以惇德敏行如君者君年甫有室

已卓乎其不可尚如此使天假之年由壯而老其所就  
宜何如耶為之銘曰

學殘文缺理域湮搜竒抉怪戡厥真伊誰卓礫排糾紛  
果行不忒成性純清獻之後幾其人年雖不永永於聞  
後來觀者徵斯文

封南京刑部郎中呂公墓碣銘

南京刑部郎中呂君聞父喪之十日匍匐過予泣以告  
曰晟不幸始擢第為進士而先妣見背有祿不逮養于  
今十有五年祿入稍豐而先考又見背然猶可以追晟  
於不孝者獨賴四三君子如前少卿李公學士江公今

僉都御史高公侍郎章公高文鉅筆為先考妣圖不朽  
固已幸矣晟猶慮幽室一閉則述行之文銘葬之辭後  
之人無由考見更乞君大書之晟歸而勒石墓上斯又  
幸焉晟生不能致孝養惟於送終大事則不敢不勉予  
與君同年君為庶吉士同在翰林又同仕兩京義不可  
辭公諱子榮字以仁先世歷城人始祖安國仕唐為衢  
州刺史兵亂移居永豐之岑陽至宋由荆湖提刑遷兵  
部尚書死事諱祉者又去岑陽一舍居新豐九傳而至  
興甫公曾大父也大父彥成父文敷母詹氏公蚤喪父  
侍母孀居備孝養出入必告得時物必先奉母母或不

懌必衣冠而侍俟解顏乃已比終哀毀自力襄事一夕  
忽夢母歸有戚容既寤虞墓有盜亟往捕之果得將為  
盜者是歲有群烏來巢宰木人以為孝誠所感既免喪  
語及二親必泣下痛諸昆弟蚤世撫教其子與已子均  
州里中有貧不能自給者多賴以濟有爭訟者或就公  
取決邑大夫賢之嘗辟為千夫長三年稅長十八年無  
瑕額可指晚年屏家事置別業于柴村與從子致仕通  
判用和同遊意有所會形諸賦咏彙凡平生所作詩為  
一帙題曰新豐集公嘗自號新豐居士故云配宜人鄭  
氏諱懿恭邑名家主中饋奉賓祭適豐約之宜家雖

裕猶躬紡績嚴飭子婦非大故無敢言歸寧者生五男  
子高昇輝晟綱晟舉進士由工部主事陞今職公卒於  
成化乙酉八月二十九日壽六十有七宜人壽五十四  
以景泰辛未正月十三日卒其年月日葬柴村呂塢之  
原茲將以其年月日奉公柩合葬銘曰

維呂有宗肇于新豐慶斯積也奕世愈隆傳至於公重  
培植也公德以崇宜人來從君子匹也術業旣攻乘時  
奮庸子克迪也鸞誥貤封命服在躬荐恩澤也壽命  
考終垂裕無窮莫茲宅也

處士陳公墓碣銘

公諱倫字叔綱姓陳氏廬州合肥人高祖三省曾祖重  
一祖聞皆以公之父平江恭襄侯貴贈平江伯妣皆贈  
一品夫人恭襄諱瑄洪武中蔭嚴指揮同知累陞中軍  
都督府都督僉事永樂初以靖難功首進伯爵父之督  
餉兩淮勲績茂著于今五十年更幾人為之而漕夫輓  
卒徒知有恭襄名猶得以享其遺利而他人不與焉此  
其為烈豈一人之能一世之望哉恭襄五子長佐嚴父  
爵次儼次儀事

英廟為勲衛卒官都指揮僉事又次即公自幼知學脫  
略統綺性簡傲有四方志念伯叔氏皆效勞于國而仲

氏早世顧無幹蠶于家者乃身任之勞勤不恤貲用日  
底於饒蘇常諸郡多膏腴田公購得之凡若干頃歲入  
之豐足以贍族人又推其餘以周給鄉人生無以為養  
死無以為歸者皆賴焉景泰間從子平江侯豫留守南  
都操已廉慎公計其所得祿不足以奉祭享待賓客時  
出帑中金佐之又不足則以田在吳江者盡歸其租入  
以資費恭襄卒葬江寧縣太南鄉之原其隴地故隘充  
拓之亘山周數十里置田千畝供祀事山之南舊有佛  
廬名大山者久廢斥緡錢數千修復之集僧徒為守隴  
之備晚年建一樓于居之左偏題曰晚香偃息其中以

待老焉公娶唐氏高郵衛指揮某之女子男一復錦衣  
衛指揮先公一年卒公素所鍾愛而痛其年之不永遂  
感疾亦卒成化二年三月己未壽七十有二以弟侃之  
子巽後至是巽具公平生來泣拜請銘將以是年八月  
辛酉葬先壠之次銘曰

才堪用世而歛之德足以範俗質儼封君而散之義足  
以周族此盡乎人者固衆所同而全乎天者又已所獨  
也吁嗟陳公令終有倣咨爾後人以嗣芳躅

贈南京刑部員外郎邵公墓碣銘

公姓邵氏諱賢字啓明衢州常山人其先由范陽徙河

南康節三世孫諱溥仕宋徽猷閣待制南渡後家于淞  
有諱澤者理宗嘉熙二年狀元及第官至吏部侍郎始  
徙常山六傳而至原善有卓行嘉遜弗耀則公之考也  
公賦性質直體貌端凝有學術業養父母愛敬兼至與  
弟啓常居終身同爨正統戊午原善卒葬有成事市區  
火與其居密邇公號呼啓常三數人狼狽舁柩出舍傍  
火已及踵室廬皆燼而棺獨無恙一時驚傳謂公之孝  
誠殆無愧於漢古初也天順丁丑夏久不雨鄉人需公  
禱白龍洞神祠公辭曰吾非能神呪禹步奚從濟曰率  
巫而雩何若公精誠感格公從之至無所為第一念閔

雨頃之雨洪注自是每遇旱邑大夫必禮致公禱禱必  
應必獲善歲父卒事母徐盡孝母年九十四終時公年  
已高居倚廬寢苦枕塊饘粥不入口形容顛顚竟感風  
痺疾以卒天順己卯十一月十一日壽七十一配陳氏  
邑華族子澍行內植賢聲外播歸公十年恒以未乳為  
慮永樂戊戌正月三日生子思祥問之姑知其為男一  
笑就褓而卒再娶魯氏賢足繼之亦先公卒公之葬以  
天順庚辰十二月某日其墓在宣風鄉井泉里子二男  
長思祥次文祥魯出二女長適楊壘次適元氏縣學訓  
導祝偉孫七人曾孫一人思祥舉進士拜行人歷官刑

部郎中成化己丑以賢勞授 誥命贈公南京刑部陝  
西司員外郎陳氏魯氏皆宜人思祥與予同年擢第又  
同官兩京雅厚遂以公元氏倩所述狀來屬銘銘曰  
學之植也斯理以明行之飭也斯意以誠誠於感神早  
可致兩焚巫曝厓奚益於事誠於事親欠不為暴時無  
郅憚孰旌其孝公行卓偉其才孔良有迪嗣人以顯以  
揚鼎食之豐公雖不待贈官錫號卒及其配其配淑若  
歸不同歲維銘之同維譽之彰

贈吏部郎中陳君墓碣銘

君姓陳氏諱孟雍字玉成別號梅軒越之餘姚人高祖

壽曾祖富之祖仲賢考得祥洪武中被薦不起築室居  
姚江濱無嬰塵累俗之態因自號環清處士君其冢子  
也五歲喪母貝氏哭無時處士憐其孤惻為求後母俞  
俾善字之俞携其所生子來胥居偏愛其子而於君弗  
德君承之以歡恭順備至且為其子殖產俞感悟遂為  
慈母君每於事親暇日遊心文史尤潛心術數之學與  
人談揚摧今古娓娓不厭所交多一時名士擇其尤賢  
者禮為子師居家必謹於禮春秋祀享必誠潔客至款  
洽必豐腴而自奉甚薄人有以匱乏告厚遺之邑東五  
里有竹山渡當明越要衝捐貲為倡建石梁行者便焉

君博愛鄉人而德足以感之強暴者聞之沮氣悖倫理者遷而向善使天假之以壽此其化人成俗之功豈止於惠利之施而已哉年四十二以宣德乙卯九月十七日卒明年十一月某日葬竹山東岡娶吳氏邑名族女端重柔嘉克執婦道君諧敬焉年四十喪夫事姑孝治家有條貫至於延師教子尤無替君志成化壬辰二月十三日卒於正寢壽七十有七子三人霖雷季即雲登景泰甲戌進士第擢吏部主事陞郎中累贈君奉議大夫吏部文選司郎中封母為太宜人女二人適黃埕華岳皆有官于時孫八人策蕪湖縣丞範籥邑庠生節簠

簡筌某曾孫男六人雲聞計且行乃屬其鄉人兵部員外郎徐瓚具事狀過予請銘銘曰

維孝維義百行冠冕如母不殊卒為聖善化及於鄉行之以躬豈惟惠利周彼困窮孰振其華有子帥教祿不逮養 貤恩有誥婉婉宜人克相克承若若紫綬身膺顯榮不負厥初宜享其久壽考令終于今罕有竹山之原茂木高墳其名不隕太史刻文

存畊處士劉君墓碣銘

處士姓劉氏諱俊字用章別號存畊先世大興人曾大父成大父慶 國初選繇尺籍挾高貲徙家桂林同時

徙者或貧不能達病不能興資給之治療之所全活者甚衆時識者已知劉氏必有後慶生端是為處士之父處士少從元進士保定冉克常游涉獵經史弱冠喪父事母薛盡孝母性嚴重處士間出與人奕呼之未至遂竟日不食必謝過乃食處士自是不復與人奕二姊寡徙居舍旁撫育其孤以完其節景泰中嘗積粟千斛值歲儉富商有利之者購以重價將移之他境處士不聽卒減價糶以利鄉人有願出息以稱貸者亦不聽先世嘗有田數頃居氓佃之租入之數必視其豐歉而為之盈縮歲苟歉矣不取盈焉與人交久而能敬人有過掩

飾之甚於為己而揚人之善如不及治家必以禮訓子  
必以義方故諸子皆臻於有成景泰丙子本策聯名鄉  
薦成化丙戌復同舉進士處士壽六十以辛卯六月三  
十日卒配傅氏先五年卒子四人長本次立次榮未授  
官卒次昱庶生孫六人處士之卒本為南京刑部主事  
將歸以某年月日奉柩葬桂林城南某山之原衰經過  
予請銘且曰惟我先君居家庭惇化厚倫之誠表于宗  
姻而內行著焉處鄉黨尊賢容衆之德洽於遠近而外  
美彰焉至於樂道之心老而彌篤行義之志久而不替  
揆之於古皆應銘法願夫子圖諸予與刑部交因其子

知其父銘之實宜銘曰

有奕劉宗基于析津八桂之遷有患在人人之懷之天  
實報施孰其承之處士是嗣既庶其休亦篤於義不墜  
益封以衍厥世胤祚蕃昌簪紱蟬聯匪徒人為敷佑自  
天營祿方殷 馳恩且下甲子一週倏焉觀化桂城之  
陽土厚水深我銘其歲以永徽音

靜菴處士吳君墓碣銘

靜菴處士吳姓諱順字斯貞曾祖諱仲聞祖諱原父諱  
清蘇州吳縣人 皇朝洪武初徙居京師其先世在吳  
擅有貲業後雖經徙而其業不墜蓋自其祖考以來德

善之積有傳有繼不徒事廢舉以治生用奇而已也處  
士天性醇朴幼嘗學問長而納交四方賢士大夫凡修  
身治家之道處世應物之方皆熟聞其故事苟合義為  
之必力不以難廢不以久怠其所居都城西新河其地  
濱江商旅雲集暑雨泥淖行者病之處士倡義甃甃治  
道又患其病渴也鑿井數十布諸道周句曲大茅峯石  
徑險陁草木叢茂捐資命工斧其巉嶸芟其薈穢以便  
登者橋梁圯壞死喪無告見者必葺聞者必給諸所施  
予未易殫舉說者謂陰德如此宜有昭報徵諸往事其  
兆已露永樂辛丑嘗侍父貿易交南閱歷萬里屬時寇

孽梗化衆多罹禍而處士父子旋歸無恙天順癸未鄰  
有火患氣焰方烈不可嚮邇處士籲天遂至熄滅越是以  
還年壽寢高貲業寢盛有子克家樂而忘老入於是  
益信其獲報之不爽也娶戴氏有賢行凡處士所為又  
多其自內相之生二男長文次壽先一年卒孫男三鎮  
欽鍾初處士之無恙也予偶出郭訪李立之太常至其  
家見其筋力尚強年雖耄不敢當主客禮延予登具慶  
堂四壁張縉紳詩文甚富立之且為屬予詩予諾之閱  
月予姻劉廷賓叅政自湖南赴閩任再過其家訪之則  
處士亡十日矣嗚呼人生一世間如夢幻泡影若處士

者予見之始終不四三決旬已遽有幽冥之感而世之  
沉酣聲利者侵尋暮景猶溺而不止而不知歸正首丘  
予於是重有感也處士之卒以成化癸巳九月十五日  
是月三十日葬江寧縣新亭鄉朱岡山之原前葬文持  
叅政君狀衰經踵門請予銘銘曰

有殖不培或隳或成有積不施或虧或贏吁嗟處士善  
繼善承匪曰繼承厥有義聲遐耆是登胡福是膺無疾  
而終維善之徵都城之南鬱鬱佳城維後之詒太史作  
銘

南京鴻臚寺左寺丞劉君墓碣銘

君姓劉氏諱儉字宗禹其先不知何許人有諱仲昭者仕唐知淳梁縣有惠政民立生祠去官因家于邑磁石塘故今為淳梁人曾祖隆文祖自誠父仕琳母程氏君弱冠入邑庠以才俊有聲諸生中正統辛酉領鄉薦壬戌乙丑戊辰三至禮部名皆在乙榜辭不就景泰辛未中進士第擢行人司行人奉使琉球國賜金織羅衣一襲寶鏤千貫君諭中山王以恩信諸所饋遺皆辭不取王敬憚之先是使外國者多重載而歸君歸裝蕭然士大夫亦以是稱焉天順初被誣謫官廣東廉州衛知事時廣西盜起流劫高雷廉諸郡勢猖獗甚君率所部士

捍禦之寇退陞俸一級未幾丁母憂改浙江寧波衛任  
且滿巡撫都御史備倭都指揮交章薦君

上亦雅知君賢陞都察院都事三載給勅命進階贈  
厥考如其官母妻俱贈封孺人踰年載陞今職而君已  
屬疾蓋視事未浹旬而歿成化丙申四月十三日也君  
為人持已端慎言論謹直是是非非不為附和遇事有  
為無少屈撓居常暇日手不釋卷操觚成文不煩構思  
他如風鑒星命之術亦旁習之能通其說昆弟四人克  
篤友愛合族百餘爨處之咸有恩義噫如君者可謂修  
諸已者有本見於事者有用究而施之其所建白宜何

如而徒厄於命沉鬱於下僚遭迴於數十年之久卒使  
其不盡展布以死豈不重可惜哉君生於永樂甲午六  
月六日壽六十有三配鳳岡嚴氏子二男綸先卒紘為  
邑庠生君卒後十日紘來省君號慟幾絕遂奉柩歸以  
某年月日葬某山之原謂予與君同年知君為詳乃持  
其姻家南京吏部主事朱本狀泣拜請銘銘曰  
才可施而遭時蹇連志可伸而歲不我延嗚呼劉君可  
為者人不可者天從古已然今奚咎焉

樂勤處士朱君墓碣銘

樂勤處士朱君諱昂字景顯常州無錫人年七十以成

化癸巳九月二十九日卒乙未十一月十七日葬前葬  
其子珏持其姻南京刑部副郎談綱狀來請題墓維朱  
氏為邑舊族其所居甘露鎮有喬木大者數十圍鄉人  
稱大樹下朱家蓋自其五世祖福五在勝國時已著有  
家聲積而能散以義授承事郎散官時有持考亭家牒  
來售者承事謂世次遼邈不可考不納士論高之曾祖  
子盛祖仲傑刻意紹述父士廉尤長厚有前人風生處  
士五齡而失恃士廉去館周氏貳室留處士依祖母以  
居而長育於世父比冠亦出贅錢以常氏携幼弟晨撫  
愛之久之士廉歸處士亦歸與其弟營養食必豐寢必

安有疾必請禱疾小愈喜見顏間及卒也呼號頓絕  
歛至葬必誠必信置守塚之人買田給之歲時薦祭樂  
與哀并其先世嘗建觀音祠于中街閱歲滋久敝壞弗  
支處士葺焉曰福田利益非吾所祈吾第知繼述吾先  
嘉貺吾鄉人爾其治家務勤儉居常無少暇逸課僮奴  
生事作業不使媮惰不徒自甘淡泊雖客至亦無豐設  
所居室廬僅蔽風雨歲入祇具饘粥苟有餘贏必推以  
與人賑人饑寒資人婚喪隨其力之所及而於待宗婣  
尤甚周悉與人交恭而有禮無長少一致人有情不知  
自程過不知自訟者必忠告之不計其人之能從與否

蓋其心誠厚於仁篤於義故其所為汲汲多類此配錢氏生子珏嚴訓迪之中成化乙酉京闈鄉試卒業太學孫男四長正為邑庠生次直節介皆聰穎不凡古人不云人生在勤勤則不匱又云儉者德之共也人惟其饕餮故不閑理義縱弛則皆廢媮生而亡積聚求其能自樹立且不可安能及人能不為人患苦足矣又安望其濟人如處士者自幼至老恒以勤自勵平生衣食僅僅取足而於人咸有利焉非所謂視人猶已抱道而隱者歟宜其以遜世自將以用世之才授其子最其行銘之以為世範宜無靳也銘曰

吁嗟處士賢遠於人既潔其身亦厚於倫受祉以年垂  
休以子銘以永存於千百禩

太安人趙氏墓碣銘

戶部員外郎孔君喪其母太安人趙氏自京師馳還予  
時已叨拜成均之命往弔孔君君泣謂予曰宗顯幼孤  
幸而獲與士齒粗知理道以求無忝為先聖王後者實  
惟吾母氏之教母氏聖善在今時雖里閭姻戚皆知之  
久而忘焉雖為吾孔氏子孫或不能盡知幸不鄙而賜  
之銘將刻石墓上垂不朽則宗顯不仁不明之責幸賴  
君可逭予諾而別焉居三月孔君以書來速銘且致吾

姻福建叅政段君伯誠所為狀按趙氏邑名族諱玉成者其族之良生太安人有淑質為求佳對聞同里生孔廷珮者有賢聲且系出闕里曰歸吾子無如是生遂納聘焉廷珮為人渾厚簡默號靜軒見太安人容止端重崇尚有素心大慊曰是真吾配也舉內政授之而專意治外時廷珮二親皆在堂太安人事之盡孝姑吳氏歿繼事費氏不久又歿又繼事王氏閱四十年更事三姑無畧刻怠事無辭色少迂其意諸娣妯化之亦相率以勤相煦以和一室雍然無纖芥隙嫌正統辛酉廷珮不諱年四十有六太安人泣曰天乎使吾夫子賢而不壽

意者其後之克昌也其平生篤教子吾其顯而成之自  
是趣宗顯於學雖寒暑不輟天順初元舉進士授戶部  
主事三載給勅命贈廷珮如其官太安人亦受封焉  
太安人既貴又富有祿入躬勤儉如始歸時惟推其餘  
以濟人之乏則無少吝鄰姬王氏疫且死往視之至再  
且資其饘粥費比死又買棺葬之人以義稱久之宗顯  
進職為副郎然念母年高移疾歸養逾年趣之行宗顯  
不得已就行而留其妻何子宿家居奉母曾無幾時而  
太安人遘疾以至不起成化六年十一月廿三日也壽  
七十有二子二長即宗顯次宗達早夭嗚呼人孰無婦

也或傷於忌克孰無母也或蔽於愛私知以順為德以慈為教者鮮矣惟太安人得天賦之全承姆教之素匪徒知之尤允蹈之卒之亢其宗成其子俾其夫無遺憾焉是皆可傳也為之銘曰

不隕不封不蠹以為工備四行以為成執一節以自終有碣其阡令名無窮

徐季昭妻趙氏墓碣銘

吳人徐季昭居南京以醫術鳴南京士大夫多往來季昭所必款洽終日盡歡乃已方是時其妻趙氏在中饋烹肥擊鮮為佳設出美醢以佐歡其有無豐約一不以

煩季昭故季昭座上客益衆豈惟其賓主相得亦趙氏有以順承之也趙氏歸季昭五十又八年生四男六女既畢婚嫁季昭益日以無事優游待老以成化二年卒後五年辛卯九月丙戌趙氏亦卒壽八十又三矣季昭之客往弔之相與感悼昔遊至於隣姬里媪亦相與齎咨涕洟懷令儀而道盛福蓋其平生能推有濟無饑寒之資吉凶之具其所施予雖多而不吝至老而不衰亦其性然也趙氏諱安姑蘇趙廷珪女始生而敏慧父母愛之既長而開明姆氏教之女紅之暇略涉書史擇對而歸以養舅姑奉祭祀卒相夫子以亢徐宗信乎隋王

通氏所謂男女之族各擇德焉後世專尚門閥以諦言  
祿祿者豈不為大謬也哉男曰坦曰堅曰壁早卒曰垣  
女適曹萱陸禧王原陸瓊伊淦朱枋孫男七鎰銓鑑銀  
鏞錢欽是歲閏九月辛酉葬江寧縣某鄉之原祔季昭  
北垣奉浙人金崇德狀來泣拜請銘蓋垣能紹父志以  
世其業觀其汲汲焉惟恐其親有善不傳以圖存於予  
可知其為賢子矣銘曰

古稱女婦之行以順為正以義為至配適君子俾式彰  
其譽貽厥胤祚俾克延於世嗚呼趙氏其殆庶幾乎是  
矣

潘孺人池氏墓碣銘

節孝先生潘公之配孺人池氏以成化辛卯八月某日卒癸巳某月日葬武進縣德澤鄉林莊先塋合節孝妣其子介持貢士翟永齡狀來請銘其墓曰吾先子之葬國子司業趙公嘗為之銘茲敢以累執事凡所以昭吾考妣之行於不朽者永惟二先生是賴嗚呼孺人賢偶也而介之志良可憫為之表曰潘氏世為汝南望姓其徙家毘陵自宋中書右丞德祐始右丞之下凡數世皆不仕至公曾大父子常稍出仕為元常熟州教授而大父伯庸父彥中又不仕然自負名閥鄉之人雖驟起一

時致貴富苟非世有令緒率羞與為匹其所與為婚亦  
惟門地相埒此孺人之所以為潘氏婦也節孝諱芳字  
孟賢幼爽朗孺人之父瑩中每過彥中見之輒竒之願  
妻以女久之彥中下世衆謂宜罷婚瑩中曰吾業已許  
之不可以存亡易心以孺人歸焉節孝失怙時年甫六  
歲母陳氏辛勤長育教之以學自脫略綺紈被服儒素  
以至於卓然承家不失為君子之歸而陳之心力亦勞  
瘁甚矣孺人入門事姑極孝凡可以代其姑以輔相其  
夫者無所不至姑疾既革節孝每夜籲天祈以已筭益  
親孺人亦從而禱焉既歿哀慟雖免喪不輟自是常服

惟布素非時祭大禮不御華采之服正統己巳節孝卒  
士大夫最其行以節孝為私謚孺人謂介曰爾父平生  
礪志期於無忝所生而名不顯於時今歿而以是易名  
斯可以少慰矣我為人婦所當守者薛爾為人子所當  
盡者孝吾與爾當交勉焉入教於是脩身慎行以  
求無忝於其父承顏順志以求無違於其母者日兢兢  
焉孺人安其養孺居自保以壽考終而介亦寢以篤行  
聞於人然則孺人之賢豈徒無愧於婦道而不尤克全  
乎母道哉孺人生於洪武壬申六月十八日壽八十一  
子即介娶李氏二女蔣孟高鄒公正其壻也銘曰

潘池之睦夫豈偶然旣曰世望亦以才賢允矣節孝飭  
躬勵行壯老一節嬾之以正介也疑疑率義孔時有嚴  
斯迪以訓以慈內治之成為母為婦我銘其阡尚配於  
古

淑人王氏墓碣銘

南京戶部左侍郎侯公之配淑人王氏年六十五以弘  
治三年五月初三日卒于北京其子觀為戶部主事即  
日去官治喪卜以是年十二月某日奉柩葬雄縣之東  
侯留村乃以書來告期於公公曰是宜有銘謂予嘗辱  
與聯官以屬予銘淑人諱慶年其先河南洧川人父諱

武從其兄自遼陽千戶調彭城衛故今為京師人母某氏洲人生而溫靜年十九歸公時公方劬學每誦讀至夜分亦事縫紉至夜分乃休公登景泰甲戌進士第歷官戶部主事員外郎每旦必夙興整衣冠以俟公朝謁公出知鳳翔府數請迎姑就養訖不至比陟叅政于山西復請自迎公曰吾母昔憚遠涉今去京近當成行爾無庸自往既而果至視膳羞問燠寒事之甚謹後公入朝為光祿卿而姑始歿哭之過時而哀公服除轉左僉都御史巡撫甘肅其地在西北極邊武猛士嘗擁衆譟軍門至紛不可治公患之遂不與俱西閱三載始遣使

來迎又二載公復召為兵部侍郎歲中二子相繼歿且  
尋有南京禮部之命復不與俱南蓋二婦新寡諸孤藐  
在孩力請於公願留以撫育之亦因以督僮奴葺田廬  
預為公歸老之計公蓋不能強也淑人始以公貴封安  
人繼封恭人今封淑人當是時公方負老成宿望為  
上所簡注卿相之召命旦夕下以荐有加封焉而淑人  
不待此相知者之所為悼惜而予欲為之書也淑人五  
子長泰中成化甲辰進士授刑部主事次豫皆先卒次  
即主事觀中戊戌進士起家登封縣尹次巽國子生其  
一夭二女長適戶部尚書殷謙之子璋次適戶部尚書

李衍之子鶴皆國子生孫五男詳訥餘未名銘曰

翼翼司徒功施于時義不顧私洲人是毗出入

四朝位望隆赫維榮有家淑人之錫天書五色鳳翥龍  
翔副筭六珈煒其身章世祿之承子亦顯仕聖善之褒  
其承未已奄其亡矣孰繫其存薦美垂休刻此銘文

嚴孺人吳氏墓碣銘

孺人吳氏諱妙真吳之長洲武丘鄉人年二十一歸同  
邑嚴氏為友蘭配歸三十有餘年而友蘭卒稱未亡人  
者又三十有餘年年八十四以成化壬寅二月十三日  
終于正寢明年癸卯十二月初一日與友蘭合葬于彭

華鄉許溪之原葬幾十年而墓上之石未有文蓋其子朴嘗持其鄉人今雲南按察使張翥狀來請未果至是又再拜以請曰朴今年已七十一旦溘先朝露則先生之文終不可得而朴不孝之罪亦終不可追矣予聞之矍然乃為之言曰孺人之生性行端淑而敏慧過人父大海母魏氏怜之且樂其能孝比歸遂移其事親者以孝養舅姑舅歿事姑鄭得其歡心凡生而衣食之奉殯而喪葬之具皆竭力營辦不以干之異爨妯娌曰我冢婦當自盡也友蘭讀書明經授徒里中凡家政率自綜理至躬紡績以佐資費曰使吾夫無懷內顧得專心焉

以善游諸人也朴生而才幼趨之學比長俾嗣為里社  
師而治其家亦如其父在時曰庶吾兒能世其業以無  
忝所生也於是鄉之人聞而稱賢之曰為婦為母之道  
其殆庶幾乎孺人二子長即朴娶吳氏次擣娶顧氏先  
二年卒三女皆先卒周英王旻張容其壻也孫男五庸  
倫理愚昆曾孫男四序唐度庶朴字公素號泛萍能書  
善歌詩旁通星命之學吳中士大夫多與之游至則倒  
屣迎之而予嘗從之問休咎亦相得歡甚是故宜其有  
求於予也銘曰  
有儒其宗有傳有繼人亦有言是父是子孰相于內孰

迪於成令妻壽母亦有賢稱賢孰與京為婦克孝錫類  
隤休皇有顯報子婦在側孫曾滿前以志養志以克永  
年螽斯之慶音羌栢舟之操我作銘詩千載同調

思軒文集卷之十五